

明紀

冊六

明

史

卷

八

明紀卷第四十五

賜進士出身工部候補主事虞衡司行走陳鶴簪

卹贈知府銜給雲騎尉世職內閣候補中書孫男克家參訂

神宗紀七

起萬曆二十八年庚子訖萬曆三十二年甲辰凡五年

二十八年春正月賊乘官軍宴夜襲營千乘良玉擊敗之追入賊境連破金筑等七寨紕亦督諸將克丁山銅鼓嚴村賊遣子惟棟及其黨楊珠等五道並出焚龍泉走都指揮楊惟忠李化龍劾諸大帥不用命者沈尙文逮治元鎮紕皆革職充爲事官御史吳達可請因

始和布令舉皇長子冊立冠婚禮簡輔臣補臺諫撤礦稅中使不報時都御史溫純御史馮應鳳及楊天民並以冊立冠婚爲言皆不報已乃命營慈慶宮以居皇長子二月戊寅京師地震丙戌李化

龍大誓文武趣諸道進師高折枝督西陽宣撫冉御龍敗賊於官壩與馬孔英先師期一日入真州用土官鄭葵路麟爲鄉導別遣邊兵

千扼明月關諸軍鼓行前連破四寨次赤崖抵清水坪封寧關破賊營十數逼桑木關關內民降者日千計折枝設三大砦處之禁殺掠降者日衆劉綈進擣楠木山羊簡臺三峒峒絕險賊衆數萬連營固守綈分兵攻其三面大戰於李漢壩綈左持金右挺劍大呼曰用命者賞不用命者齒劍士鬪死者四十人餘益奮賊大敗奔入峒乘勢焚之盡克三峒生擒賊魁吳尙華穆照賊以兵二萬屬其子朝棟曰爾破綈江馳南川盡焚積聚彼無能爲也朝棟由松坎魚渡分道出綈伏萬人羅古待松坎賊以萬人伏營外待魚渡賊而別以一軍策應賊果至伏盡起綈帥部下轉戰斬首數百追奔五十里賊聚守石虎關綈亦掘塹守桑木關爲賊要害山險箐深賊憑高拒折枝令馬千乘與御龍出關左右周國柱擣其中賊用標槍藥矢銳甚官軍殊死戰奪其關逐北至風坎關賊復大敗連破九砦黑水諸關苦竹羊崖銅鼓諸寨國柱攻金子壩無一人疑有伏焚空砦十九嚴兵以待

賊果突出擊敗之孔英乃留王之翰兵守白玉臺衛饒道平茶邑梅兵守桑木關而親提大軍營金子壩陳璘軍次白泥賊衆迎戰璘分兩翼躡其後賊少挫追奔至龍溪山賊合四牌賊共拒四牌在江外與江內七牌皆五司遺種九股惡苗素助賊者也璘廣招撫乃進軍偵知賊有伏令游擊陳策用火器擊之賊據險矢石雨下璘先登斬小校退者以徇把總吳應龍等陷陳賊大潰四牌賊保兒囤璘遣二裨將逼之中伏乃募死士從應龍等奮擊賊潰夜由山後遁追敗之袁家渡四牌賊遂盡李應祥未受事副將陳寅連克數囤拒賊四牌高囤下別遣兵從間道直擣龍水囤他將蔡兆吉自乾坪抵箐岡敗賊首謝朝俸俘其妻子吳廣屯二郎壩大行招徠賊驍將郭通緒迎戰襲走之陶洪安村羅村三砦並降他部來歸者數萬廣擇其壯者從軍通緒扼穿崖囤廣督土漢軍擊破之賊聞桑木關破大懼遣弟世龍及楊珠以銳卒劫之翰營之翰走殺饒卒無算平茶兵來援賊

始退孔英還擊世龍復卻裨將劉勝奮擊賊乃奔官軍進朗山口由朗山進蒙子橋深箐翦翳賊處處設伏悉勦平之賊遣其黨詐降謀爲內應折枝盡斬之伏以待珠果夜劫營伏發賊驚潰追奔至高坪廣分四哨進攻崖門別遣永寧女土官奢世續等督夷兵二千扼桑木埡諸要害以防鑲道諸將連破數囤進營母豬塘賊令通緒盡發關外兵拒敵廣伏礮手五百於磨槍埡外南岡下而遣裨將趙應科挑戰埡兩山夾中甚隘通緒橫槊衝應科應科陽北通緒追出埡遇伏急旋馬中礮墜方躍上他馬伏兵攢刺之殪餘賊大奔官軍逐北盡降之遂薄崖門或言水西佐賊化龍詰之安疆臣斬賊使二氏交遂絕賊聞諸路兵益進頓足曰不用孫時泰計今死矣議分兵守時泰曰兵分則力薄乘官軍未集先破其弱者餘可退也賊善之聞童元鎮發烏江喜曰此易與耳謀縱之渡江密以計取監軍按察使楊寅秋言烏江去播不遠宜俟諸道深入與俱進元鎮不從永順兵先

奪烏江賊遣千餘人沿江叫罵以誘之諸軍既濟復奪老君關參將謝崇爵督泗城及水西兵進拔河渡關三月望賊以步騎數千衝水西軍軍中驅象出戰賊多傷俄駕象者斃象反走擲火器者又誤擊己營陳亂泗城兵先走崇爵亦走爭浮橋橋斷殺溺死者數千人是日璘亦渡江聞謝朝俸與張佑石勝俸等營七牌野豬山遂夜發抵苦練坪分軍夾擊賊敗走之遂入苦菜關河渡既敗烏江相去六十里猶未知明日參將楊顯以永順兵三百出哨道遇賊數萬咸爲水西裴永順兵不之疑賊掩殺三百人亦襲其裝直趨烏江烏江軍亦不之疑遂爲賊所破爭先渡江賊先斷浮橋士卒多溺死顯及二子與焉三萬人不存十一將校止崇爵等三人江水爲不流貴陽聞警居民盡避入城遠近震動魏允貞疏陳時政缺失言行取諸臣幾經論薦陛下猶不輕予一官彼魯坤馬堂高淮孫朝輩試之何事舉之何人乃令其銜命橫行生殺予奪恣出其口廷臣所陳率國家大

計一皆寢閣甚者嚴譴隨之彼報稅之徒悉無賴奸人鄉黨不齒顧
乃朝奏夕報如響應聲臣不解也胥徒入鄉民間猶擾況緹騎四出
如虎若狼家室立破如吳寶秀華鈺諸人禍至慘矣而陛下曾不一
念及錢穀出入上下相稽猶多奸弊敕使手握利權動逾數萬有司
不敢問撫按不敢聞豈無吮膏血以自肥者而陛下曾不一察及金
取於滇不足不止珠取於海不罄不止錦綺取於吳越不極奇巧不
止乃元老聽其投閒直臣幾於永錮是陛下之愛賢士曾不如愛珠
玉錦綺也疏奏不省 諸軍聞烏江敗斂兵不進者旬日陳璘請退
師李化龍不可用尙方劍斬謝崇爵益徵兵檄鎮雄土官隴澄邀賊
歸路劉綎先被調南京右府僉書欲謝事化龍固留之力薦於朝綎
乃復受事踰夜郎舊城攻克滴淚三坡瓦窰坪石虎諸隘直抵婁山
關關爲賊前門萬峯插天叢箐中一徑纔數尺賊設木關十三座排
柵置深坑百險俱備綎分奇兵爲左右路閒道攀藤趨關後而自督

大軍仰攻奪其關追至永安莊兩路軍亦會縋慮賊衝突聯諸營一據婁山關爲老營一據白石口爲腰營一據永安莊爲前營都指揮王芬者勇而寡謀每戰輒請爲前鋒連勝有輕敵心獨營松門堙之衝距大營數里穆照遣使洩其狀四月朔賊襲殺芬守備陳大綱天全招討楊愈亦死亡士卒二千人縋聞帥騎卒往救賊帥諸苗決死戰縋親勒騎衝其中堅部將周以德周敦吉分兩翼夾攻賊始大奔楊應龍幾被獲追奔至養馬城而還縋乃移營近關堅壁請濟師馬孔英已奪賊養馬城抵海龍第二關下賊守兵益多孔英軍已深入而諸道兵未有至者酉陽延綏兵皆退賊躡殺官兵六十人居數日縋進克後水囤營於冠子山乃合兵連克海崖海門諸關進逼海龍囤賊上囤死守吳廣攻崖門徑小止容一騎賊衆萬餘出關拒戰曹希彬懸賞千金士攀崖競進追至第四關關上男婦盡哭賊黨自殺其魁羅進恩帥萬餘人出降其第一關猶拒不下廣乘夜疾進奪其

關關內民爭獻牛酒廣聞綖孔英已入關遂合希彬軍連戰紅碗水
土崖分水關進營水牛塘賊知廣孤軍謀欲襲之遣人詐降廣測知
其詐堅壁以待賊擁衆三萬直衝大營諸將殊死戰三日他將來援
賊乃退廣進逼海龍囤賊令婦人乞降哭囤上又報應龍仰藥死廣
信之已知其詐急燒第二關奪三山絕賊樵汲路璘進營楠木橋次
湄潭賊悉聚青蛇長坎瑪瑙保子四囤地皆絕險而青蛇尤甚璘議
同日攻則兵力弱止攻一囤則三囤必相助乃先攻長坎等三囤陳
良珖師亦來會令伏囤後別以一軍守板角關防賊逸璘督諸將力
攻三日並克之青蛇四面陡絕璘圍其三面購死士從瑪瑙後附葛
至山背舉礮賊惶駭諸軍進攻焚其茅屋賊退入囤內木石交下將
士冒死上毀大柵二重前後擊之賊大敗斬首一千九百有奇七牌
之賊亦盡乃分兵六道攻克大小三渡關乘勝抵海龍囤下隴澄先
遣部將劉岳王嘉猷攻拔苦竹關及半壩嶺烏江敗二將移新站賊

伏兵大水田別以五千人來襲敗還嘉猷乃揚聲擣大水田而潛以一軍拔大夫關直抵馬坎斷賊歸路與安疆臣合會都指揮徐成將兵至合泗城土官岑紹勳兵再克河渡關賊將張守欽袁五受據長箐萬丈林永順兵擊破之生禽守欽攻清潭洞復禽五受會朝議責元鎮敗狀逮下獄論死令李應祥并將其軍陳寅取他道渡河潛爲浮橋以濟師賊失險乞降者相繼應祥悉受之賊死守黃灘關俄石勝俸等帥萬餘人降告曰去黃灘三十里有三關入播門戶也先襲破之則黃灘孤難守應祥然其計令寅帥精卒四千夜抵關下勝俸以數十騎誘開門殲其戍卒黃灘賊懼寅督諸將渡河攻關前勝俸由墳林暗渡襲關後賊遂大敗疆臣亦帥所部奪落濠關至大水田焚桃溪莊八路師大集海龍囤遂築長圍更番迭攻會化龍聞父喪詔以墨纓視師化龍念前囤險不能越令孔英帥勅兵併力攻其後水西兵受賊重賄多與通且潛以火藥遺賊璘知之與監軍者謀令

疆臣退一舍隣移其處置鐵牌百餘距圉丈許賊強弩無所施又爲
籬板於柵前賊每夜出劫爲釘傷不敢復出諸軍相持四十餘日天
苦雨將士馳泥淖中苦戰六月乙亥天始霽紆進攻土月二城部卒
龔萬祿先登克之賊益迫散金募死士拒戰無應者丁丑隣以夜四
鼓從圉後銜枚上賊斲睡斬其守關者樹白幟鳴礮賊大驚潰廣軍
亦登應龍起提刀巡壘見四面皆火光倉皇謂妻子曰各自爲計不
復能顧若矣與二愛妾闔室自縊因命人焚其室廣獲其子朝棟急
覓應龍屍出之烈焰中廣中毒矢失聲絕而復甦播州平計出師百
十有四日斬級二萬餘生禽自朝棟以下百餘人化龍露布以聞乃
乞終制去播州自唐乾符中入楊氏二十九世八百餘年至是始絕
張忠孫朝誅求百方魏允貞每事裁抑會忠杖死太平典史武三
傑朝使者逼殺建雄縣丞李逢春允貞疏暴其罪朝怒劾允貞抗命
沮撓帝留允貞疏不下而下朝疏於部院李戴等力稱允貞賢請下

允貞疏平議山西軍民數千恐允貞去相率詣闕懇冤兩京言官亦連章論救帝乃兩置不問 升廣西永康縣爲州省思同州入焉

禮部尙書余繼登自署部事請元子冊立冠婚疏累上以不得請鬱鬱成疾每言及輒流涕曰大禮不舉吾禮官死不瞑目病滿三月連章乞休不許請停俸亦不許秋七月卒贈太子少保諡文恪繼登樸直慎密寡言笑當大事言議侃侃居家廉約學士曾朝節嘗過其里蓬蒿滿徑及病革視之擁麤布衾羊毳覆足而已 辛亥旱敕修省

給事中張問達言礦稅諸閹一朝銜命輒敢糾彈郡守甚且糾撫按重臣而孫朝至誣詆清介絕俗之魏允貞所攜程守訓陳保輩至箠殺命吏毀室廬掘墳墓不一按問若萬方怨恫何不報 刑部主

事謝廷讚言閣員當補臺省當選礦稅當撤冠婚冊立當速詔令當信持疏跪文華門候命踰時帝震怒遣田義詰責 八月辛未慈慶

宮成命內閣草敕傳示禮官上冊立冠婚及諸王分封儀比敕上留

不下沈一貫疏趣之帝曰朕因小臣謝廷讚乘機邀功故中輟俟皇
長子移居後行之其命諸司靜俟遂斥廷讚爲民奪尙書蕭大亨侍
郎邵杰董裕俸一歲貶郎中徐如珂員外郎林耀主事鍾鳴陞曹文
偉三秩調極邊 丙子罷朝鮮戍兵 九月甲寅停刑 炒花犯遼
東副總兵解生等敗沒巡按王業宏劾巡撫李植及諸將失律植以
卻敵聞且詆業宏業宏再疏劾植欺蔽詔解植官聽勘 初湖貴之
交有皮林苗與九股苗相接洪州司特峒寨吳國佐桀黠知書爲諸
苗所服其從父大榮以叛誅國佐收其妾黎平府持之急遂反自稱
天皇上將其黨石纂太稱太保合攻上黃堡誘敗參將黃冲霄追至
永從縣殺守備張世忠而噉之掠屯堡七十餘焚五開南城陷永從
圍中潮所時方征播州未暇討也冬十月辛未命陳璘等移師討之
丙子楊榮妄奏阿瓦孟密諸番願內屬其地有寶井可歲益數十
萬願賜敕領其事帝許之溫純言緬人方伺隙寶井一開兵端必起

不聽榮又誣劾尋甸知府蔡如川趙州知州甘學書皆下錦衣獄已
又誣劾雲南知府周鐸下法司提問 陳增數窘辱長吏巡撫鳳陽
都御史李三才以氣凌之裁抑其爪牙肆惡者密令死囚引爲黨輒
捕殺之增爲奪氣民以礦稅故多起爲盜浙人趙一平挾妖術竄徐
州易號古元妄稱宋後與其黨孟化鯨馬登儒輩聚亡命署僞官期
明年二月諸方並起謀洩皆就捕一平亡之寶坻見獲三才言陛下
愛珠玉民亦慕溫飽陛下愛子孫民亦戀妻孥奈何陛下欲崇聚財
賄而不使小民享升斗之需欲綿祚萬年而不使小民適朝夕之樂
自古未有朝廷之政令天下之情形一至於斯而可幸無亂者今闕
政猥多而陛下病源則在溺志貨財臣請渙發德音罷除天下礦稅
欲心旣去然後政事可理已又言臣爲民請命月餘未得請聞近日
章奏凡及礦稅悉置不省此宗社存亡所關一旦衆畔土崩小民皆
爲敵國風馳塵驚亂衆麻起陛下塊然獨處卽黃金盈箱明珠填屋

誰爲守之皆不報 給事中田大益極陳礦稅六害廷臣交章請罷
諸監帝皆不省 李鳳劾逮廣東鄉官通判吳應鴻等梁永趙欽肆
虐富平知縣王正志捕其黨李英杖殺之因極論二人罪欽亦以英
事訐奏帝命逮正志給事中陳惟春言正志劾欽罪多宜提訊欽所
劾正志事宜下撫按覈實免其逮繫御史李時華言近日所逮吳應
鴻勞養魁蔡如川甘學書及正志等俱宜赦下撫按勘虛實不得以
一人單詞枉害良善皆不報未幾永疏訐正志帝命諸抗違欺隱者
悉指名劾奏重治之宦官益張 鄭貴妃弟國泰疏請皇長子先冠
婚後冊立署禮部事侍郎朱國祚言本朝外戚不得與政事冊立大
典非國泰所宜言況先冊立後冠婚其儀仗冠服之制祝醮敕戒之
辭升降坐立之位朝賀拜舞之節因名制分因分制禮甚嚴且辨一
失其序名分大乖違累朝祖制背皇上明綸犯天下清議皆此言也
楊天民亦斥其非國泰懼委罪都指揮李承恩奪其俸 十二月乙

未御午門受播州俘沈一貫請陪侍賜面對不許磔楊朝棟等於市
剉應龍屍 初大西洋意大里亞人利瑪竇汎海抵廣東香山澳爲
萬國全圖言天下有五大洲第一曰亞細亞洲凡百餘國而中國居
其一第二曰歐羅巴洲凡七十餘國而意大利居其一第三曰利
未亞洲亦百餘國第四曰亞墨利加洲地更大以境土相連分爲南
北二洲最後得墨瓦臘尼加洲爲第五而域中大地盡矣其人悉奉
天主耶穌教言耶穌生於如德亞在亞細亞洲中西行教於歐羅巴
其生在漢元壽二年皆荒渺不可考及是馬堂以其方物進獻禮部
言會典止有西洋瑣里國無大西洋其真僞不可知又寄居二十年
方行進貢所貢天主及天主母圖神仙骨諸物皆屬不經及奉旨送
部又不赴部審譯而私寓僧舍不知何意乞給賜冠帶還國勿令潛
居兩京與中人文往別生事端不報已帝嘉其遠來賜之居第芻米
頗厚利瑪竇遂留不去中國有天主教自此始 陳奉培克萬端伐